



6. November 2009

Inatsisartut suleriaasianni § 36, imm. 1 naapertorlugu Naalakkersuisunut apeqqudit imaattut matumuuna saqqummiuppakka:

Naalakkersuisunut apeqqudit: Nunamut Namminermut, Pinngortitamut Avatangiisinullu Naalakkersuisup ukiaq manna Inatsisartuni ataatsimiinnitsinni suut Naalakkersuisuni ilaasortatut Inatsisartut ataatsimiittarfianiit Naalakkersuisut sinnerlugit akissutit saqqummiuppai?

Saqqummiussaqaarsimanngippat ilumut pisariaqarpa Naalakkersuisoqarfimmik akisuumik Naalakkersuisoqarfeqartuarnissaq?

Pitsaanerunngila Nunamut Namminermut, Pinngortitamut Avatangiisinullu Naalakkersuisoqarfiup akisussaaffii agguarlugit Naalakkersuisunut akisussaaffingitileraanni? Nunamut Namminermut, Pinngortitamut Avatangiisinullu Naalakkersuisup suut inatsisissatut ukiaq manna Inatsisartut ataatsimiinneranni saqqummiuppai?

(Inatsisartuni ilaasortaqa Kristian Jeremiassen, Siumut)

Tunngavilersuut:

Inuit tamat oqartussaaqataanerat illersortuassallugu pisussaavugut tamatta. Isumaqarpungali eqqarsaatigilluakkamik aammalu siunnerfilimmik Naalakkersuisoqarfiit agguataarneri isikkoqartariaqartut.

Paaserusuppara Nunamut Namminermut, Pinngortitamut Avatangiisinullu Naalakkersuisup ukiaq manna suut Naalakkersuisuni ilaasortatut Inatsisartut ataatsimiittarfianiit Naalakkersuisut sinnerlugit akissutit saqqummiussimanerai, taamatut paasinnikkusunninnut tunngavigivara eqqaamasakka malillugit ukiaq mannalunniit saqqummiussaqaarnikuunngimmat Naalakkersuisuni ilaasortatut, isumaqarfiginarlunilu Naalakkersuisoqarfik pilersinniaannarlugu pilersinneqarsimasoq.

Pitsaanerunnginnersoq aamma paaserusuppara Nunamut namminermut, Pinngortitamut Avatangiisinullu Naalakkersuisoqarfiup akisussaaffii agguarlugit Naalakkersuisunut akisussaaffingitileraanni. Tassami siornatigut ajornartorsiutigineqarnikuunngimmata maannakkut Naalakkersuisuusup akisussaaffii isumaginiassallugit.

Nunamut namminermut, Pinngortitamut Avatangiisinullu Naalakkersuisup suut inatsisissatut ukiaq manna Inatsisartut ataatsimiinneranni saqqummiunnerai paaserusuppara.

Apeqquteqaatiga ullut suliffiusut nalinginnaasut 10 qaangiutsinnagit akineqarnissaa piumasarivara.